

17 JUN 1997

Gatra-Malaysia

MALAYSIA SUDAH JAUH MENDAHULUI INDONESIA, KATA GATRA

KUALA LUMPUR, 17 Jun (Bernama) -- Gatra, majalah mingguan berita yang paling berpengaruh di Indonesia, mengakui bahawa Malaysia yang dulu dianggap oleh rakyat Indonesia sebagai "adik", kini sudah melangkah jauh mendahului negara yang terbesar di Asia Tenggara itu.

Menurut Gatra, dalam satu komentar yang disiarkan dalam keluaran terbarunya, salah satu faktor yang mendukung kejayaan Malaysia adalah usaha Perdana Menteri Datuk Seri Dr Mahathir Mohamad membangkitkan rasa percaya diri bangsanya melalui apa yang disebut sebagai "Malaysia Boleh".

Faktor yang satu lagi ialah semangat tidak mahu kalah kepada Singapura yang dilihat melalui projek Koridor Raya Multimedia (MSC) dan pembangunan Pelabuhan Klang sebagai antara pelabuhan yang terbaik di dunia untuk menyaingi republik itu.

Usaha menjadikan Malaysia sebagai negara informasi bukan mimpi di siang hari hari kerana Malaysia merupakan salah satu negara yang agresif dalam mengirim warganya ke luar negeri untuk belajar, kata Gatra.

Gatra berkata, suka atau tidak suka, Indonesia harus "acungkan jempul" (menyatakan syabas) kepada Malaysia.

Malaysia juga boleh memanfaatkan tenaga yang ada untuk meningkat kemampuannya.

"Sedangkan kita yang dulu dianggap kakak sehingga dijadikan tempat belajar dan bertanya, kini boleh dikatakan kita kurang diperhitungkan," kata Gatra.

Majalah itu berkata Indonesia tentu tidak boleh "marah" dengan kejayaan pembangunan di Malaysia, dan prestasi Malaysia di pelbagai bidang memang baik berbanding Indonesia.

"Malah, kalau perlu, kita jadikan Malaysia sebagai "benchmark" (tanda bandingan), sebagaimana yang mereka (Malaysia) lakukan terhadap Singapura."

--BERNAMA

AU PR